

Morning Dogri (NSD) National News Bulletin 01-10-2024

- जम्मू कश्मीर च असेंबली चुनावं दे त्रीए ते खीरले गेड़ तैह्त इसलै मतदान चला'रदा ऐ।
- प्रधानमंत्री नरेन्द्र मोदी जमैका दे अपने समकक्ष एन्ड्रियू होलनेस हुंदे कन्नै अज्ज डेलीगेशन सतह दी गल्लबात करगंन।
- भारती सेना आईडीईएक्स पैहलकदमी तैह्त अज्ज 8में खरीद अनुबंध पर दस्तखत करगंन।
- कृषि ते सरबंधत गतिविधिएं तैह्त इस ब'रे अगस्त म्हीने च पिछले ब'रे दे इससै अरसे दे मकाबले च 17.7 प्रतिशत दा बाद्धा दर्ल कीता गोआ ऐ।
- कानपुर क्रिकेट टैस्ट मैच दे अज्ज खीरले ध्याड़े बंग्लादेश भारत खलाफ अपनी दूई पारी दा खेड्ड फही शुरू करोग।

<><><><><><>

JK-3rd Phase Voting

जम्मू कश्मीर च असेंबली चुनावं दे त्रीए ते खीरले गेड़ लेई इसलै मतदान चला'रदा ऐ। 7एं जिलें च फौले दे 40एं चुनावं हल्के च अमन-शांति आले ढंगै सिर वोट पाने लेई सुरक्षा दे व्यापक ते पुख्ता प्रबंध कीते गोदे न। मतदान अज्ज बडलै 7 बजे शुरू होआ जेहड़ा संजा 6 बजे तगर चलोग। 5 जहार 60 मतदान केन्द्रें च 20 जहार मतदान अमला तैनात कीता गोदा ऐ। अज्ज जेहड़े 7एं जिले च मतदान होआ'रदा ऐ, ओ न कश्मीर प्रांतै दे बारामुला, कुपवाड़ा ते बांडीपोरा ते जम्मू प्रांतै दे जम्मू, उधमपुर, सांबा ते कठुआ। 39 लक्ख शा बी मते मतदाता अज्ज 415एं मेदवारें दी किस्मत दा फैसला करगंन। कश्मीर दे मुख्ख मेदवारें च उपमुख्खमंत्री मुज्जफर हुसैन बेग, वशारत बुखारी, सज्जाद गनी लोन ते नासिर असलम वानी शामिल न। जम्मू प्रांतै च मुख्ख मेदवारें च देवेन्द्र सिंह राणा, चौधरी लाल सिंह ते रमण भल्ला शामिल न। पैहले दऊं गेड़ें च 61 प्रतिशत ते दुए गेड़ च 57 प्रतिशत वोटिंग होई ही।

सबने गेडें दे वोटें दी गिनतरी हरियाणा कन्नै इस म्हीने दी 8 तरीकै गी होग। पेश ऐ आकाशवाणी जम्मू दे संवाददाता गुलशन रैणा हुंदी इक रिपोर्ट।

<><><><><><>

Delhi Police

कनून बवस्था दे हालात गी ध्यानै च रखदे होई दिल्ली पुलसै राष्ट्रीय राजधानी नमीं दिल्ली कन्नै लगदे त्रऊं जिलें च ते उंदे कन्नै लगदे इलाकें च विरोध प्रदर्शनें ते 5एं जां एहदे शा मते लोकें दे किट्ठे होने पर बंदश लाई दित्ती ऐ। एह 3 जिले न मध्य दिल्ली, नमीं दिल्ली ते उत्तरी दिल्ली दे भारती नागरिक सुरक्षा संहिता दी दफा 163 तैहत कले गिमां एह हुक्म लागू कीता गेआ ऐ जेहड़ा इस म्हीने दी 5 तरीकै तगर लागू रौहग। पुलस दे कमीशनर संजय अरोड़ा होरें दस्सेआ जे हालिया स्थिति करी पैदा होए दे कनून बवस्था दे हालात करी इस चाल्ली दी रौह पुट्टी गई ऐ। उनें आखेआ इसले जम्मू कश्मीर ते हरियाणा च असैंबली चुनां होआ करदे न ते दिल्ली दे बन्ने परां गड्डिणं ते व्यक्तिएं दी आओजाई पर लगातार तक्क रखना बड़ा लाजमी ऐ। उनें इब्बी आखेआ जे 3 अक्तूबर महात्मा गांधी हुंदी जयंति दरानवीवीआईपी ते बड्डे अधिकारिएं दी आमदोरफत करी बी प्रतिबंध आला एहका हुक्म जारी कीता गेआ ऐ।

<><><><><><>

PM Jamaica

प्रधानमंत्री नरेन्द्र मोदी होर अज्ज नमीं दिल्ली च जमैका दे प्रधानमंत्री डॉ. एन्ड्रियू होलनेस हुंदे कन्नै शिष्टमंडल सतह दी गल्लबात करगंन। गल्लबात दरान दपक्खी सरबंधें गी मजबूत बनाने आस्तै दौनें मुख्खें बश्कार केइएं समझौते पर दस्तखत होने दी मेद ऐ। डॉ. होलसेन हुंदी एह पैहली भारत यात्रा ऐ। ओह इत्थें राष्ट्रपति द्रौपदी मुर्मू ते उपराष्ट्रपति जगदीप धनखड़ हुंदे कन्नै बी मलाटी करगंन। 4 दिन दी यात्रा दरान ओह उद्योग ते बपार जगत दे प्रमुख्खें कन्नै बी मलाटी लांगन। जमैका दे प्रधानमंत्री होर कल वाराणसी जांगन।

<><><><><><>

INDEX

भारतीय सेना नै सरकार दी प्रमुख पैहल रक्षा उत्कृष्टता नवाचार तैहत 8में खरीद अनुबंध पर दस्तखत कीते न। रक्षा मंत्रालय नै दस्सेआ जे कल नमीं दिल्ली च रक्षा उप-प्रमुख लैफ्टिनेंट जनरल एन.सी.राजा सुब्रामणी हुंदी मजूदगी च जेनरेशन ऑफ क्वाटम सिक्योर दी खरीद आस्तै क्यू नू लैब कन्ने अनुबंध पर दस्तखत कीते गे। एह अनुबंध एलगोरीथन आधारित एनक्रिप्शन प्रणाली दी थाहर लैग ते होर मती ते बेहतर सुरखा जकीनी बनाग। इसलै नवाचारी प्रौद्योगिकी विकास तैहत भारतीय सेना दियां 74 रक्षा उत्कृष्टता नवाचार परियोजनां न जिंदे विकास आस्तै 77 स्टार्ट अप उद्यमें दा सैहयोग लैता जा'रदा ऐ।

<><><><><><>

Kazakhstan-Military

भारत कजाकिस्तान संयुक्त सैन्य अभ्यास काजिंद 2024 दा 8मां संस्करण अज्जै थां उत्तराखंड च शुरू होआ। 120 कर्मिये आले भाती सशस्त्र बले दी अगुवाई भारतीय सेना दी कुमाऊ रेजिमेंट दी बटालियन करा'रदी ऐ। रक्षा मंत्रालय मुजब सांझे अभ्यास दा मकसद आतंकवाद रोधी अभियान चलाने आस्तै दौनें पक्खे दी सांझी सैन्य क्षमता गी बदाना ऐ। मंत्रालय नै आखेआ ऐ जे एह अभ्यास अर्ध शैहरी ते पहाड़ी इलाके च केंद्रित होग।

<><><><><><>

August Credit

भारतीय रिजर्व बैंक नै दोहार कन्ने सरबंधत मासिक डेटा जारी कीता ऐ। कल जारी आंकड़े च अगस्त म्हीने च राईबाई ते सैहयोगी गतिविधिएं आस्तै दोहार च पिछले ब'रे दी इस अवधि दी तुलना च लगभग 18 फीसद दा बाद्धा दर्ज होआ ऐ। इस दरान उद्योग दोहार च बी लगभग 10 फीसद दा बाद्धा होआ। प्रमुख उद्योगे च रसायन ते रासायनिक उत्पाद, खाद्य प्रसंस्करण, पेट्रोलियम ते बुनियादी ढांचा दोहार च बाद्धा होआ। हालांके सेवा क्षेत्र आस्तै दोहार बाद्धे च गिरावट रेई। अगस्त म्हीने एहदे च 15.6 फीसद दा बाद्धा होआ जिसलै कि पिछले ब'रे अगस्त च 21 फीसद दा बाद्धा होआ हा।

<><><><><><>

Health Draft

सेहत मंत्रालय नै असाहयबमारिएं थमां ग्रस्त ते ओह मरीज जिनें गी लाइफ स्पोर्ट पर रखेआ गेआ ऐ, उंदे थमां नेई चीजां वापस लैने दे सरबंधै च मसौदा दिशा निर्देश जारी कीते न। इस बारे लोकें दे बचारे गी बी ध्यानै च रखेआ गेआ। दमाकै च गंभीर सट्ट लगने करी लाचार मरीज जिंदे च 72एं घंटे मगरा बी कोई सुधार सेई होंदा ऐ। उनेंगी इस श्रेणी च शामिल कीता गेआ ऐ। डाक्टरें गी एहदे बारे च केइएं आधारें पर सोच बचार करने मगरा फैसले लैने दा सलाह दित्ती जंदी ऐ। सेहत मंत्रालय नै इस गल्ला पर बी जोर पाया ऐ जे आईसीयू च केई मरीज ला-इलाज बमारी थमां ग्रस्त होंदे न ते उनेंगी लाइफ स्पोर्ट सिस्टम करी कोई लाह थोने दी संभावना नेई होंदी ऐ। नेही स्थिति च जीवन रक्षक प्रणाली करी कोई लाह नेई होंदा ऐ ते एह मरीजें दी पीड़ ते बे-वजह दे आर्थिक बोझ गी बंधांदा ऐ। मंत्रालय नै आखेआ ऐ जे नेह फैसले च सेहत सरबंधी नैतिकता ते कनूनी आधार महत्वपूर्ण ऐ।

<><><><><><><>

Cricket

कानपुर क्रिकेट टैस्ट मैच तैह्त अज्ज बडलै बंग्लादेश भारत खलाफ अपनी दूर्ई पारी आला खेड्ड फही शुरू करोग। कल उनें दो विकटां मुआइयै 26 रंज बनाए हे। कल आला खेड्ड जिसलै मुक्केआ तां मामिनुअल हक ते शादमान इस्लाम क्रीज पर हे। भारत लेई अश्विनी नै दो विकटां लेइयां। एहदे शा पैहले खेड्डे दे चौथे ध्याड़े मेजबान भारत नै 52एं रंजे दी बढत लेइयै 285एं पर पारी समाप्ति दी घोशणा कीती ही। भारत दिसयां 9 विकटां जाई चुकी दियां हियां। यशस्वी जैसवाल नै शानदार प्रदर्शन कीता, के.एल.राहुल नै 43एं गेदें 68 रंज बनाए न। पैहली पारी च बंग्लादेश नै 233 रंज बनाए। भारत दे जयप्रीत बुमराह नै 3 विकटां लैतियां। बंग्लादेश लेई मानिनुल हक नै 107 रंज बनाए। खेड्डे दे दुए त्रीए दिन बरखा करी इक बी गेंद नेई खेड्डी गई। चेन्नई च पैहला मैच हारने मगरा बंग्लादेश दऊं मैचें दी श्रृंखला च भारत थमां अगगे गै 1-0 कन्नै पिच्छें चला करदा ऐ।

<><><><><><><>